



37798/R

MARE F. X. de

Digitized by the Internet Archive
in 2019 with funding from
Wellcome Library

<https://archive.org/details/b30520794>



TRACTATUS

MEDICO-CHIRURGICO-CHEMICUS

DE

C A N C R O

ET

S P I N A V E N T O S A

CURABILIBUS

PER MEDICAMENTUM HACTENUS

SECRETUM, NUNC COMMUNICATUM,

EDITUS

A

FRANC. XAV. DE MARÉ

PHILOSOPHIÆ ET MEDICINÆ DOCTORE.



V I E N N Æ,

Typis JOAN. THOMÆ NOB. DE TRATTNERN,

CÆS. REG. AULÆ TYPOGRAPHI, ET BIBLIOPOLÆ.

1 7 6 7.


F. IV.



331506



P R A E F A T I O

 *Quamvis mihi in scribendo tra-
Etatu hoc ingentem ingredi
videar Pelagum, tamen
non possum, quin Eum medicaminis
gratia virus Carcinomatis aperti &
Spinæ Ventosæ spoliente facultate
pollentis confirmata experientia edo-
ctus publicæ luci darem. Quem
enim latet plurimos hoc malo ten-
tari homines, præprimis tam ex
nobili, quam inferiori natas stirpe*

*fæminas miserrime interiisse? in
tenerrima ætate etiam ex utroque
sexu a Spina Ventosa fuisse macla-
tos? quam triste hoc sit spectaculum,
sæpius perpendi, & iisdem opem
ferre posse sollicitus optavi, si suffi-
ciens mihi experientiæ constitisset
ex medicamine argumentum, quod
tamen nunc abunde notum est; qua-
re mihi felix videor contemplans ad-
miniculum miseris ferre posse, qui
tantum fætorem, dolores, crucia-
tus diu, noctuque in mortem usque
sustinere coguntur, taceo de mœrore,
qui tamen abunde affligit, dum se
à sanguine junctis omnino etiam con-
dolentibus derelictos sentiunt, fu-
git enim omnis miseros tales timore
correptus, per halitum, tactum &c.
crudelem hunc morbum hæreditario
quasi*


quasi jure in se descendendi vim possidere. Nemo est, qui, dum paucos ante annos quandam Cancro feminam, aut quendam Spina ventosa afflictum esse intellexit, conclamatum de ægri salute esse dubitasset, quam tamen horrendam prognosim, ab aliquibus ab hinc annis incertam esse omnino innotuit, cum plures ex Cancro restitutos esse experientia docuerit: Et ideo nunquam satis deprædicandus erit Perillustris, ac Magnificus Dominus de Störck, Sac. Cæs. Regiarumque Majestatum Archiater, nec non Facultatis Medicæ Vindobonensis p. t. Decanus Spectabilis. Dum jam dudum miseræ similium sorti succurrere omnibus adlaboraverit viribus, sub cujus sollicitudine

ope extracti *Cicutæ* pristinae sanitati restitutæ sunt Cancro mirum in modum vexatæ; hic erat Ille, per quem venenatum Medicamentum antehac visum in utilitatem humani generis enucleatum, terrarum orbi, quod satis miratu dignum est, sævum Cancri malum profligari posse inclaruit. Vidimus sæpenumero missos ad nos exterarum regionum Legatos, ut genuinum hujus *Cicutæ* extractum obtinere, & ejus usum satis intelligere queant: Quanti non erunt, qui ex diro hoc morbo recuperatam Illi soli sanitatem in acceptis referendam habebunt? Quid igitur mirum, si & ego doctissimo Magnifici hujus Viri exemplo motus Carcinomati & Spinæ Ventosæ resistens, pluribus nunc firmatus
ex-

*experientiis secretum publicæ luci
edere audeam? audax quidem me-
rito censendus essem, si Illius Do-
ctrinam cum mea vili, æquali Bi-
lanci exponere præsumerem, absit
hanc audaciam a me mente concipe-
re, cum inanis & audax foret
prærogativæ cupido: sed ideo solum
publico communicare secretum hoc
statui, ut ægris cum malis his con-
sistentibus auxilium ferri queat.
L. B. operam meam benigne susci-
piat, & si in uno alterove errasse Illi
videar, id sua benevolentia recom-
penset, cum me amor in similes mi-
seros solus, non profunda ad scriben-
dum tractatum hunc allicuerit do-
ctrina: si itaque L. B. gratiam
tuam, uti utilitatem ex opusculo hoc
ægris promanantem spero, obten-*

*turus sim, ea obtinui, quæ votorum
meorum meta sunt, nam ægris ca-
lamitosissimis hoc malo extremum
obrutis succurrendi & Tibi L. B.
quoad posse meum est, satisfaciendi
studii, & desiderii mei est*

F I N I S.



An-



Antequam de Carcinomate dicere
exordiar, de scirrhis, ut-
pote origine Carcinomatis
quædam præmittere neces-
sarium duxi: Eundem itaque esse tu-
morem durum, indolentem, plus mi-
nusve resistentem in glandulosis parti-
bus sedem suam figentem satis innotuit,
quod vero scirrhi in glandulis oriantur,
confirmat CELEBERRIMUS BOERHAA-
VIUS in Aphor. 484. dum ait : *Ejus
ergo sedes omnis glandula. & Aphor.
392. si pars inflammata, glandulosa, calor
internus externusve magnus, materies im-
pacta, inertior crassior &c. fit tumor du-
rus indolens glandulæ: vocatur Scirrhus,*
quamvis Galenus in aliis corporis par-
tibus oriri posse dixerit, cum & simi-
les tumores duros, indolentes in his

reptos experientia docuerit, tamen hic loci illos prætereo, cum ii in longe diversa sæpissime a scirrho mala terminentur: Quod confirmat ILLUSTRISSIMUS L. B. VAN SWIETEN in comment. §. 484. pag. 844. dicens: *verum, dum alium sæpe exitum habeant hæc mala, neque tam facile in Cancrum degenerent, forte melius tumores scirrhoëides vocari possent distinctionis causa.* Oritur autem scirrhus in glandulis ab omni eo, quod succum specialem in iis pro diversitate secretionis ab ipsa fabrica & structura vasorum & partium dependentis elaboratum coagulare, inspissare, exsiccare, hinc per emissaria exire ineptum facit, quod contusiones, compressiones etiam externe efficere valent, per eas enim emissaria glandularum tam angusta redduntur, ut secreti succi in glandulis remanere cogantur, tenuissima ergo pars eorum per subtilissima tantum venarum ostiola reabsorbetur, vel

vel etiam per emissaria angustata fluit, ex quo fit, quod crassum retineatur, semper magis augeatur, magis inspissetur, glandula in majorem molem explicetur, vascula per ejus membranas decurrentia premantur, & sic tumor; durities vero partim a vasis infarctis, partim simul coagulatis, inspissatis & exsiccatis liquidis; absentia vero doloris a nervis in glandulosa fabrica distributis fortiter compressis, deducitur: Dum itaque hæc glandula premit aliam sibi vicinam, continget id eidem, uti primæ a suo liquido orbatae, ex quo successive partis cujusdam glandulosæ major & magis perceptibilis tumor durus nascitur, quo se scirrhus patefacit: docet experientia, quam plurimas vel scirrhus adhuc, vel etiam Carcinomate jam laborantes fæminas in explicanda funesti sui morbi historia narrare, se in primordio minimam, quam nihili habuerunt, sensisse duritiem, quæ semper magis magis-

gisque increvit, donec mamma in hanc molem fuerit elata; & hoc non aliunde factum est, quam quod per induratum & a liquidis suis jam spoliata glandulam aliæ vicinæ continuo pressæ fuerint, videtur ergo satis mammas esse glandulosas, ut affirmat ILLUSTR. L.B. VAN SWIETEN in Comment. in Aphor. Boerhaavii §. 484. pag. 848. ajens: *Quamvis enim mammas glandulosas esse negaverit Ruischius, talis tamen illarum fabrica est, atque illa lactis a sanguine secreti indoles, ut in mammis satis facile Scirrhi nasci possint.* Est quidem in iis arteriarum & vasorum lactiferorum perfecta communicatio, tubuli enim lactiferi cum vicinis majores efformant ramulos, & sic vasa lactifera majora fiunt, quæ iterum angustata minimis fistulis lac in papillam ferunt; lac itaque, cum perfectissima sit, etsi vasa eodem turgescant, vasorum, unde exivit, communicatio, certe iterum pot-

potest revehi absque eo, quod mamma detrimentum patiatur, sed cum idem ex natura sua adeo pronum sit ad coagulum, facile in colostrum abire potest. Videmus quidem sæpe numero matribus suas proles ablaçantibus mammas in immensam molem increfcere, & dolere, usque dum lac reductum sit, verum si coagulati ejus quid remaneat, quod semper magis suo sero privatur, & vi circulantis a tergo ulterius urgeri nequit, eundem effectum in glandulosa fabrica efficere potest, ac per pressionem externam vel contusionem causari posse dictum est. Quod autem lac facile coaguletur, testatur ILLUSTRISSIMUS L. B. VAN SWIETEN, dum in eodem priori enumerato §. dicit: *Verum lac ex sua natura in coagulum facile tendens, stagnans in vasis lactiferis dilatatis, in colostrum & serum abit &c. colostrum vero sero suo orbem hærebit immeabile in vasis lactiferis, magisque exsiccatum tandem*

dem in scirrhum vix resolubilem sæpe abit.
Patet itaque ex his partim ob glandulosam mammæ fabricam, partim facile lactis coagulum irresolubiles scirrhos, qui pessimum producunt Cancrum, hic loci generari posse, præprimis, cum vascula earum emissaria valde sint angusta: sicut vero hoc malum in mammis contingit, ita & in reliquis glandulosis partibus fieri experientia docet, hic enim potissimum, cum compressiones, contusiones sæpius, quam in aliis partibus incaute accidere soleant, & dein lactis promptitudo in coagulum considerata est, accedit, quod tantus cum utero earum sit consensus, ut ex menstruis in gravidis, lochiis in puerperis cessantibus, si eadem valde intumescant, colligere licet, & in proVectiori ætate, dum jam quidquam scirrhosi latuit, fluxu mensium omnino abolito in majorem scirrhum & indomabilem Cancrum degeneraverint, quod
ma-

malum in effoetis potissimum fieri firmissimis argumentis probatur AB ILLUSTRISSIMO L. B. VAN SWIETEN in Comment. §. 485. pag. 854. his verbis: *Ex quibus omnibus satis patet, quantum ad scirrhum producendum vel augendum, si præextiterit, possit facere consueti fluxus menstrui cessatio.* Ex quibus concludendum est, frequentissime in mammis generari scirrhos, qui in aliis partibus externis non tam facile accidunt: interim scirrhos, nisi valida in vasis adjacentibus fiat pressio, vel in partibus vicinis, ut in Carcinoma degeneret, non subitaneam stragem intendit. Ægri itaque similes animi pathemata, cum ea impetum circulantis valde augere possint, fugiant, atque in diæta, ne quidquam de motum humorum accelerantibus v. g. spirituosis, austeris, acribus, calidis, &c. assumant, valde observent; nec corporis motus in musculis augeatur, nec minor in aere

re calido, dum subtilissima dissipantur, fiat. Cautelas cum cura elegantissimas videre licet in Comment. ILLUSTRISSIMI L. B. VAN SWIETEN a §. 490. usque §. 492. a pag. 862. usque 872. quam diu ergo scirrhus in sua indole manet, tam diu præter gravitatem nihil mali ægri sentiunt, nisi eos metus ad subsequencia forte graviora symptomata invitet, verum cum in indole sua mutatus esse inchoat, præter metum miseri etiam tristem experiuntur doloris sensum, de quo plura dicenda sunt; & ideo tractatum hunc in duo dispartiri volui capita, in quorum primo de Cancro occulto & aperto, seu exulcerato, in altero de Spina Ventosa agere statui, cui accedit parandi & utendi medicamenti secreti methodus cum observatione Chemica.

CAPUT I.

De Cancro, sive Carcinomate.

§. I.

Quamdiu præter tumorem & durtiem nullus alius sensus adest, Scirrhus est: si vero aut dolor lancinans aut pruritus, quamvis non continuo sentiatur, qui post longius temporis intervallum iterum recurrit, tunc in pejus malum Scirrhus mutatus est; cujus non inanis certe est metus, cum non tantum medicamenta quæcunque applicata respuat, sed etiam sequentibus crudelissimis cruciatibus, doloribus, & foetore putrido intolerabili miseros affligat, quo corpus vivum exeditur, & depascitur; cui accedit cruciatuum horum diuturnitas per plures menses vel annos etiam perferenda, usque tandem ob majorum vasorum erosionem hæmorrhagiâ oriundâ calamito-

fissimam hanc vitam inexplicandis doloribus mors finiat: nisi enim talis sequatur vasorum ruptio, miserrime tam diu vivunt, usque dum consumpto a putredine corpore pereant. Vocatur vero crudelis hic morbus: *χαρχίως*, *χαρχίωμα* ob similitudinem quandam cum vivo animali Cancro pedes undique porrigente referentem: Quemadmodum enim Cancer omnes chelas porrigit, ita ex omni parte Carcinomatis venæ atro sanguine impletæ exeuntes, varicosæ conspiciuntur. Ex mutatione ergo scirrhi sequitur, quod Carcinoma sit tumor durus, plus minus inæqualis, plusque minusque dolens a causis scirrhi continuantibus productus; nam causæ eædem manent, nisi quod magis augeantur, si enim vicina magis moventur, ut vasa vicina ad margines Scirrhi obstructa inflammentur, tunc Scirrhus malignus evadit, & Carcinomatis auditu mortalibus crudele vocabulum
for-

fortitur: cujus tamen duplex recensetur species, occultum nempe & apertum, etiam si quidam Authores lancinantibus jam jam præsentibus Scirrhi nomen retinuerint, ubi potius Carcinoma occultum dici poterit, cum contraria esset definitionis differentia ultima; in Scirrho enim nullus persentitur dolor, ut definivit CELEBERRIMUS BOERHAAVIUS §. 392. circa finem. Fit *tumor durus indolens* &c. & ILLUSTRISSIMUS L. B. VAN SWIETEN in Comment. §. 492. pag. 873. dicit: *Signum ergo Cancrum a Scirrho distinguens dolor est* &c. conclusit itaque, quod dolor significet inter Scirrhum, & Carcinoma indubiam differentiam.

§. II.

Quamdiu ergo succus in glandula a liquido suo semper magis orbatus hæret immutatus, tunc sola pars scirrhusa a functione sua absque magno damno aliarum partium illato destituitur, quod

per longius tempus durare potest, & usque huc erit tumor iste Scirrhus: si verò a quacunque causa vel in, vel externa motus humorum augetur per vasa viva & pervia adhuc circa scirrhi substantiam hærentia ab eo compressa, facile fiet in illis inflammatio, cum ea æqualiter, & placide motos humores tantum suscipere possint, accelerata autem circulatione a pressione jam angustata obstrui, & inflammationem sequi necesse est, unde dolor, attritus, calor & æstus oriuntur, qui sunt inflammationis effectus: per obstructum etenim vasculum globus alias circulantis respondens ejusdem diametro celerius motus nunc transire nequit, cum diameter vasculi per pressionem minutus sit, turgescit itaque vasculum extra pressionem positum, motus a tergo fit validus, obstructum vero nec ulterius propelli, nec resolvi potest, ex qua vasorum distensione, dolor, cum nervi

in

in his distribuantur, & simul extendantur, calor ex attritu originem suam nanciscitur; ubi autem major est calor & æstus a motu majori exortus, ibi facilis ad putredinem est dispositio. Si itaque hæc putrescere incipiant, brevi temporis spatio etiam scirrhusa materies in cavo glandulæ a liquido omni orbata hærens putredine corrumpitur, & majorem induet acrimoniam; sicque irritare & rodere incipiet loca, quibus inclusa est, ex quo dolor augetur, & scirrhum in Carcinoma occultum degenerasse denotat.

§. III.

Si itaque hæc degeneratio persistitur, pro diversitate conditionum malignitas major minorve, citius aut tardius pessimæ indolis fit. Conditiones vero pro diversitate scrutandæ sunt.

Ait CELEBERRIMUS BOERHAAVIUS

§. 493. *in quo gradus inflammationis vicinæ; acrimoniæ putridæ excessus in loco*

offecto, partis dignitas, glandularum nexarum numerus, & conditio; temperies totius, diversos malignitatis primæ status docet. Si enim levis tantum inflammationiuncula in partibus scirrhi vicinis, vel etiam in ejus integumentis orta sit, sæpe prudenti applicatione Emplastris Blumbati, vel Aceti Lithargyrii magna quantitate aquæ diluti sedari potest. Conferatur ILLUSTRISSIM. L. B. VAN SWIETEN in Comment. §. 493. pag. 874. Si vero major inflammatio in Scirrhi integumentis, vel in vicinis partibus, quæ illum investiant, orta fuerit, eo citius funestiora mala pertimescenda erunt: dixi in §. antecedenti, quod si calor, & æstus augeantur, facilis sit ad putredinem dispositio; si itaque major oriatur inflammatio, certe calor & æstus majorque attritus, ergo & celerior scirrhi putredinosa corruptio expectanda est, in qua acrimonia major fiet, & pro varietate indolis suæ plus minusve maligna

gna evadet, quæ scirrhi substantiam in vasis vel receptaculis adhuc hærentem putridam adeo reddit, ut vicinâ omnia erodere virulenta sanie possit; quo plus enim virulentia adest, eo citius partes depascuntur, quo minus, eo tardius, & hoc quidem per gradus. Antequam autem ad hanc malignitatem perveniat, dolores lancinantes, prurientes, pungentes, calores, tumoris in majorem molem incrementum sentiuntur, quæ signa diagnostica Cancris occulti sunt, pro quorum diversitate gradus putredinis inchoatæ judicari poterunt. Quemadmodum itaque diversa malignitatis indoles ex dolore lancinante pruritu &c. augurari possumus, dum cancer adhuc occultus est, ita ex stillantis saniei foetore, & partium vicinarum erosione in aperto indoles putredinis cognoscatur, oportet. Dignitatem partis Cancro occupatæ ideo prætereo, quia medicamento externo internis partibus, &

visceribus ab eo correptis, ut linguæ, faucibus, pancreati, ventriculo, hepatis, intestinis, utero &c. mederi nequeat.

§. IV.

Glandularum igitur nexarum numero & conditioni externe sitarum multum attendendum erit: nam, si glandulæ ita nectantur, ut ulterius malum serpere intelligatur, difficilius semper curatu id est; sic, si in mamma scirrhus diu hæserit & Carcinomatis signa adsint, etiam glandulæ subaxillares lateris ejusdem sæpe scirrhus afficiuntur, vel aliam mammam eodem malo, quod tamen non semper accidit, affici observatur, si tamen hoc contingat, certe difficilior erit medendi ratio; multo adhuc pejus accidit, si propter mutuam uteri cum mammis affinitatem idem hoc malo obrutus sit, quanta autem uteri cum mammis communicatio, facile colligitur, si puerperas post lochiorum

rum fluxum retentum, vel alias etiam cessantibus omnino menstruis crudelem hunc morbum invadere experientia doceat. Constat & ex observationibus medicis, quod, si glandulæ colli omnes induratae sint, etiam Mesenterii glandulæ facile afficiantur: quæ confirmat ILLUSTRISSIMUS L. B. VAN SWIETEN in Comment. §. 493. pag. 875. dicens: *Cum inter mammas & uterum tanta affinitas sit, sæpe & uterus simili malo laborare incipit. Tristissimum casum vidit CELEBERRIMUS BOERHAVIUS, inquit, qui hoc confirmat &c. frustra ergo in similibus casibus cura tentatur, cum malum in glandulis communicantibus redeat.* Accidit tamen Carcinoma etiam esse solitarium, neque alias sibi partes vicinas affectas esse: novi fæminam triginta circiter aliquot annorum, cujus mamma sinistra carcinomatosa fuit, quod ex dolore, & ex rubro purpureis striis variegato tumore duro colligi potuit;

absque sensibili ad tactum sub axillis duritie, sed etiam novi Matronam quandam, cui extirpata fuit mamma sinistra, quæ paulo post in dextra eodem malo afficiebatur, tandem ex vasorum majorum erosione hæmorrhagia periit. Quam plurima certe dantur funesta ulterioris propagationis exempla, *ut ILLUSTRISSIMUS L. B. VAN SWIETEN* in supra citato §. 874. clarissime exponit dicens: *vix unquam diu scirrhus insignis, & jam Cancrum minitans in mamma hæret, quin & glandulæ axillares ejusdem lateris incipiant scirrboasæ fieri.* Intelligo hic loci ergo maxime carcinomata occulta solitaria, quæ si aperta reddita fuerint, curæ dein communicandæ subjicienda erunt, etiamsi uterus affectus esset, sufficiet enim malo externo pro posse succurrisse: si vero atra biliaria temperies, aut scorbutus causæ mali essent, nisi prius corrigerentur, cum se solis scirrhum, præcipue atra biliaria

tem-

temperies, sic & cancrum producere posse pateat, frustranea medela foret, cum eadem latitaret causa, ex qua malum renasci necesse est. Acria enim vel in corpore nata, vel per ingesta illuc delata quiescentem scirrhum in Cancrum irritando convertunt, sicut autem ea hac ratione nocent, sic & omnis externa irritatio per frictionem, motum, contusiones &c. malum exasperare potest: huc spectant evacuationes sanguinis alias consuetæ, mensium, hæmorrhoidum &c. suppressæ, pariter & sterilitas causa adducitur, cum ex plurimis observatis medicis in sterilibus mulieribus non inaniter scirrhos suspicatos fuisse constet, qui augmento & ætate in carcinoma degenerarunt, in quibus facile obstructions ex angustia vasorum ortum suum habent, unde & mensium suppressio derivatur: ea ratione in statu cælibi constitutis accidere potest, præprimis intra quadagesimum

mum quintum & quinquagesimum ætatis annum , cum eodem tempore mensium fluxus cessare soleat ; quod autem hoc tempore præcipue similia mala contingere ex observationibus medicis pateat, testatur ILLUSTRISSIMUS L. B. VAN SWIETEN in Comment. §. 495. pag. 877. *adducens observationes Dionysii: quartam partem mulierum cancro laborantium hoc malo affici inter quadragesimum quintum & quinquagesimum ætatis annum &c.* de reliquis tumoribus cancrum mentientibus fungosis sine prægresso scirrho formatis hic loci non quæritur , neque de cancro in partibus internis nato.

§. V.

Hinc signa Canceri occulti recensenda sunt , si enim scitur scirrhum prægressum esse , & in hoc , quod prius factum non est, advertitur titillatio, signum est, eum mox in Cancrum mutari, cum nervi scirrhi substantiam perc-

cur-

currentes levissime tendantur, vel irritentur, si hæc tensio augeatur, sequitur pruritus, si vero hæc ita aucta fuerit, ut eorum dissolutio minuetur, dolor fit, accedit dein calor & rubor, quæ pessima inflammationis signa sunt, in vasis vitalibus, vel in ipso scirrhus, vel in ejus integumentis, vel in vicinis partibus dispersis; calor enim & rubor inflammationis effectus sunt, ut §. Imo exposui, & sic calorem facillime ad putredinem disponere, quæ molestum ejus sensum creat. Si tamen solum dolor lancinans, neque continuo, neque brevi recurrens observatus fuerit, neque scirrhus quacunque ex causa irriteretur, per longius tempus adhuc scirrhus manere potest; si vero sæpius aut fere quotidie talis recurrat, aut pruritus, aut dolor punctorius se insinuet, pejus portendit malum, cum signum sit Cancrum in exulceratum transire; pessimum vero est, si dolor urens vivi ignis instar

star accidat, indicatur enim integumenta occulti carcinomatis successive distrahi, & ab aucta acrimonia erodi, uti §. Imo dixi, sicut ergo diversi dolorum gradus minus majusve malum esse, ita & color varius plus minusve mali significat: rubellus enim levem, ruber majorem, purpureus maximam inflammationem, & jam inchoantem putredinem denotat: reliqui colores longe adhuc funestiores sunt. Ut notat ILLUSTRISSIMUS L. B. VAN SWIETEN in Comment. 497. pag. 881. dicens: *Ubi autem attenuatis jam, & erodi incipientibus integumentis Cancri subjecti color transparere incipit, primo Cæruleus apparet, aucto malo lividus, & cum jam-jam exulcerabitur, per tenuem adhuc pelliculam, Cancri ater color conspicitur. Quamdiu igitur cancer in propriis suis tunicis continetur, & in apertum nondum degeneravit, summa adest ejus durities, & quo major ea est, eo plus*
mali

mali portendit ; quam primum vero exulceratus est, & materia corrupta per erosa integumenta protuberare inchoat, prurities tanta non est, & superficies inæqualis cum nodosis eminentiis aspera & prærupta conspicitur, & ubi in integumentis distractis & erosis minor est resistentia, apex prominet, in qua parte fit plerumque exulceratio, nam resistentia imminuta solidorum vim magis activam liquidis concedit. Scirrhus itaque, si adhuc benignus sit, plurimis annis absque magno molis augmento esse potest; si autem jam in Cancrum degeneret, tumor in immensum elevatur, quod eo celerius obtinetur, dum perversa medela scirrhus irritatur, & tunc ab hac mole vicinæ venæ ita comprimuntur, ut distentæ sanguine horrendæ conspiciantur, & Cancri animalis figuram referant, ut in §. Imo dictum est. Observatio quidem docet, quod in hydropicis & gravidis abdomi-

nis

nis venæ turgeant, verum, cum ab æquali tumore subtus existente complantentur, majores quidem, non vero varicosæ admodum, quam in Cancro apparent, quia in eo prærupta, & scabra inæqualis pro diversitate locorum superficies plus vel minus comprimere solet eadem, & hæc ratio est, cur cheilarum Cancri venæ similitudinem referant. Jam, ut ad metam perveniam, huc usque cancer occultus fuit, si vero integumentorum post enumeratos paulo ante effectus erosio & saniei transfusio sequitur, cancer apertus, seu exulceratus audit, de quo quæstio hic est.

§. VI.

Differt vero hic solum a priore in eo, quod in hoc tenuis acer ichor quasi transsudando, quod in priori adhuc non fuit, exprimatur: Differt itaque definitio inter Carcinoma occultum & apertum, uti inter scirrhum, & Cancrum

occultum, scirrhus enim indolens est, Carcinoma occultum majori tumore simul elevato dolens, apertum vero non tam durum quidem, sed extremum in modum dolens & ichorem putredinosum vel transsudans, vel ex erosis partibus explorans, ex quibus omnibus colligi licet primas semper remanere causas, etsi illæ nunc magis remotæ factæ sint. Patet itaque, ut dictum fuit, ex occulto Cancro oriri exulceratum, sed non eodem modo, ut in aliis tumoribus exulceratis contingit, in iis ex simul & semel ruptis integumentis pus in copia effluit, hic vero sensim ichor tenuis acer vel per attenuatam cuticulam transsudat, vel ex cute exoriata exit, dum summo cum dolore erosa est, tandem per apertum, ut fas erit dicere, ulcus Cancer successive exprimitur. Dixi ulcus, cum vulnus recens non sit, neque subitaneæ, neque ab externo instrumento lædente acci-

derit, quo vero modo cancer à primo exordio gradatim decurrat, pro viribus dictum esse cenfeo: *Videatur CELEBERRIMUS BOERHAAVIUS. §. 499.* Totus igitur hic decursus tumori, ex eo vasorum pressioni, ex his putredini acrimonia sua ambientia rodenti, vicina exedenti &c. attribuendus erit: ex tumore enim vasa ad Cancris margines circa totam ejus superficiem posita, & in ejus substantia distributa vitalibus liquidis ad transfluxum adhuc patula continuo atteruntur ob inflammationem & circumductorum velocitatem; si continuus itaque vasorum est attritus, ea rumpi necesse est: remanebunt contenti in his humores, & putrescent, cum benigna suppurationis spes nulla affulgeat, hinc nulla corrupti a benignis separatio. Hæret enim per longissimum temporis spatium in glandulis scirrhus a coagulato liquido, donec in majorem molem a compressione ortam excre-
scat,

scat, ubi circulaturi motus non tam validus est, ut resolutio sperari possit, unde patet putredini tam funestæ viam sterni, adeoque benignum pus parari nequit; quare nec spes superest benigni a mortuo separationis: sunt enim in Cancro etiam mortuo percurrentia adhuc vasa viva & nervi, qui liquidum suscipiunt, quod ex dolore patet; si enim totum mortuum esset, nullus persentiretur dolor, & non tantus esset bonorum humorum ad parandam saniem affluxus; nunquam itaque hoc malum tolli potest, nisi pars mortua auferatur, vel vasa viva eo disponantur, ut communicatio cum reliquis impediatur, & mortua etiam reddantur, quod in Cancris minoribus fieri poterit, ubi corrosivis simul & semel totus cancer destruitur, quo facto benigna suppuratione sequente mortuæ a vivis partibus separari possunt. Quod confirmat ILLUSTRISSIMUS L. B. VAN SWIETEN in

Comment. §. 499. pag. 884. dicens:
Sic parvo, sed maligno tumore in naso externo laborantem verbi divini Ministrum curavit CELEBERRIMUS BOERHAAVIUS, dum acerrimo vitrioli oleo eroderet totum simul & semel. Ait ulterius pag. 885. de Helmontio narrante, quod vir quidam in tractu juliacensi Cancrum unumquemque sanabat, insperso pulvere indolente, atque tum demum Emplastro incarnante sanabat. Nenterus in prognosi Nro 4to pag. 271, dicit: Dantur tamen selecta, & appropriata remedia, quibus absque auxilio Chirurgico uterque Cancer tolli potest, sicut nuper demum Cancrum labiorum exulceratum in viro, & mammarum in fœmina plus quam sexagenaria sub nostra medicatione feliciter curatum fuisse adhuc dum gaudemus. Et paulo post in methodo medendi inquit: Nro 5to. In Cancro jam exulcerato præter nominata exquisitissima, & selectissima, quorum effectu jam certi sumus, cor-

rosivum scil. liquidum D. Kortholti & Balsamum vulnerarium ejusdem externe in usum trahantur. Ulterius Nro. 6to: Aut si hæc desint, auxilium Chirurgicum per sectionem est invocandum &c. Si ergo CELEBERRIMUS BOERHAAVIUS per corrosiva, etsi minimus Cancer fuerit, eum curaverit, si Nenterus se ipsum absque manu chirurgica in auxilium vocata Cancros curasse affirmat, & D. Kortholdi liquidum corrosivum, quod quidem celavit, extollat, si Helmontius de viro unumquemque Cancrum sanare potuisse, posteris reliquit, non inficias ibo, si medicamentum nostrum pluribus experiētiis firmatum, ut deinde dicetur, sincero calamo publico communicem, quo mediante mortuum a vivo separari posse experientia docet; quod externe applicatum crustam in labiis fungosis Cancri tamdiu format, donec omne mortuum separatum sit, hoc autem fieri posse confirmat Ipse ILLU-

STRISSIMUS L. B. VAN SWIETEN in Comment. §. 499. adducens Celsum L. V. Cap. 28. pag. 316. his verbis: *Pulcherrime hunc erodentium medicamento- rum usum notavit Celsus, dicens: sequitur enim sub medicamentis erodentibus crusta, quæ undique a viva carne deducta trahit secum, quidquid corruptum erat; purusque jam sinus curari potest implentibus.* Si igitur propria experientia edoctus sim, quam veteres jam novisse autoritate probatur, ut Celsus eodem Libro, capite & pagina ulterius affirmat, dicens: *Quodcunque vero medicamentum impositum est, si satis proficiet, protinus a viva corruptam partem resolvet: dixit, si satis proficiet: hæreo hic quidem anceps, quid dicere velit, verum cum tempus longius eum ad necessariam curam subintelligere autumem, vel quod non sola externa sine internis assumptis proficiant, dubitaverit, omne me deferuit dubium & anxium hæsitandi argumen-*

mentum, tum quod longiori tempore externo medicamento uti necesse sit, tum, quod simul internis miseris prospici debeat, quod suo loco dicetur, pœna dignum me censerem, si hoc innotum hætenus secretum publico celarem.

§. VII.

Brevissime itaque ea, quæ in cancri adhuc historia recensenda sunt, attingam. Dixi, quod si totum mortuum esset, & vasa viva nulla amplius in mortuo essent hærentia, nullus etiam persentiretur dolor, & separatio mortui a vivo esset superflua, neque tantus esset saniei affluxus, quæ quidem per vasa adhuc viva non adfertur, sed hic nascitur, ut in priori §. dictum est, quia etiam optimi humores huc allati corrumpuntur, & in talem abeunt, quæ tamen in principio exulcerati non tanta est, sed tempore diutius protracto semper pejoris indolis evadit, & de-

mum tam infensa fit, ut omnia instar aquæ fortis linteamina corrodat. Quid igitur mirum ! si partes adjacentes vivæ adhuc ab ea ita afficiantur, ut in tetrâ putrilaginem simul abire cogantur. Cujus rei veritatem munit autoritate ILLUSTRISSIMUS L. B. VAN SWIETEN in Comment. §. 499. pag. 885. circa finem dicens: *Videtur autem liquidum, ad Cancrum delatum ipso in loco degenerare, & malignam indolem acquirere, quamvis antea mite fuerit.* Paulo post enumeratum casum inquit: *Unde non statim in cancro exulcerato acerrima talis sanies exit, sed sensim crescit ejus malignitas quotidie aucta putredine.* Ex quo colligitur me verum dixisse, quod non statim in principio exulcerationis tam acris sanies fit, sed tempore generetur, & quod in sanguine, qui adfertur ad glandulam, nondum lateat, sed, quod hic loci fiat advecti corruptio: ut ulterius affirmat dicens: *Videmus*

an-

autem & in aliis morbis fluida in quibusdam locis corporis hærentia, & ab humorum sanorum indole degenerantia in suam naturam corrumpere allata liquida. Et pag. 886. *Ex quibus omnibus videtur patere, cancrosam massam putrefactam affluentes humores quamvis optimi fuerint, in similem malignitatem convertere. Quod autem sanies tam acris & rodens, ut dixi, tempore evadat, confirmant paulo post adducta Helmontii asserta, inquentis: Vidi lintea loco cancroso applicata, sanie hac madentia, penitus exesa, æque, ac si Aqua Forti tacta fuissent. Facile itaque, si talis sanies lintea corrodit, partes vivæ antehac compressæ adjacentes ex cancrosa materie erodi possunt, quare nullum superest dubium, quin & in ambitum, & profundum hoc malum serpere possit; cum, si illius pelles rumpantur, profundum petit, & sic suas radices explicare potest, quibus vicinis fortissime adhæret.*

Etamfi itaque talis, qui pelle amplius non perfecte involutus est, extirparetur, crudelem renasci posse verum erit, cum radices in profundum egerit. Si vero inclusus hæreat suis pellibus, & juxta externa erodat integumenta, labia tumida, dein retorta & aspectu horrenda fungiformia apparent colore cineritio, flavo, & nigro; pars enim maxima canceri est mortua, & fovetur partim a calore partium ambientium, partim a libero aëris accessu, qui ad putrefactionem celeriores multum contribuit, ut in carnibus eidem plus minus calido expositis observare licet. Diversi interim colores diversos etiam putredinis gradus significant; cineritius malus, pejor lividus, niger autem pessimus ideo observatur, quia summam esse putredinem indicat. Quo major itaque gradu putredo, eo plus apta est erodendi vascula; si ergo vas majus ab ea eroditur, lethalem sequi hæmor-

morrhagiam necesse est, maxime, si profundius serpere possit. Forte igitur vili mea rei contemplatione potius cancer occultus, si nulla amplius spes sanationis superest, in apertum mutandus erit, primo ne in profundum, & in ambitum ampliorem radices expandere queat, secundo ut ejus virus citius, & activa, pro dolor! funesta mortalibus virtus auferri possit. Certum etenim est acrioribus occulto cancro applicatis citius eundem in apertum mutari, quæ hoc evincere possunt, qua de causa ab omnibus suadetur nullum esse applicandum medicamentum, quod jam Ovidius 2. de ponto innuit:

Vulneris id genus est, quod cum sanabile non sit,

Non contrectari tutius esse puto.

Ob pessimam ergo hujus mali conditionem inquit HIPPOCRATES L. VI. Aphor. xxxviii. *Cancros occultos habentes*

tes melius est non curare, curati enim cito pereunt, non curati vero longius tempus perdurant. Voluit ille hic medicamenta localia, vel ad suppurationem, vel resolutionem juvantia intelligere, cum non tantum per virulentiam aperti & exulcerati virus augeatur, quo mediante reliquæ partes affici, quæ ei proximæ sunt, possint, verum etiam vasa vel in eo dispersa, vel circa illum posita, majora nempe erodi, ut lethalem hæmorrhagiam sequi necesse sit. Dixi vero, si nulla spes sanationis canceri occulti sit; si ergo citius, talis, ubi spes nulla est, mutetur in apertum, elevabitur potius sursum versus, & partes in ambitu illi adjacentes, & in profundo sitæ liberiores fient, neque radices suas in profundum explicare, si pelles ejus non rumpantur, poterit. Affirmat hoc ILLUSTR. L. B. VAN SWIETEN in Comment. §. 501. pag. 891. dicens: *Quo enim diutius du-*
raverit

raverit malum, eo pejor, cæteris paribus, eventus, cum tunc aliquando periculum sit, ne inferne cancer malignas radices vicinis partibus infixerit. Et sic etiam cruciatuum finem citius obtineri posse judico, tum ideo, quod citius medicamento postea enumerando auxilium ferri possit, tum ideo, quod etsi dolor, sinistra, ut suspicari licet, arte augeatur, arte etiam dextra, ne miseros tam diu affligat, citius profligetur, cum medela in promptu sit. Verum quidem est, quod ex doloribus, ab irritatione & vellicatione nervorum pendentibus lipothymia & quandoque convulsiones oriantur, quæ tamen tantum periculum, cum vires adhuc suppeditent, non minitantur, quam si illæ ex magnis hæmorrhagiis originem habeant, dum corpus viribus omnino jam destitutum est, quæ tunc accidere poterunt, dum cancer occultus sibi relinquatur.

§. VIII.

§. VIII.

Intelligo tamen hic loci tale corpus, in quo sanguis, & reliqui humores ita sunt constituti, ut in corporibus satis sanis esse solent, dum eorum indoles a Cacochymia non est nimium depravata; si enim ea prædominatur, necesse est omnes humores mutare in benignos & homogeneos; sic, si diathesis scorbutica adest, corrumpuntur humores, sic si atra bilis prævalet tenacitate sua, longior & dubia erit medendi ratio, si ea prius non corrigatur, antequam scirrhus in Cancrum mutatur; etsi enim ille cum radicibus suis medicamento extirpari posset, tamen causa in corpore lateret, quare malignos hos humores per congrua medicamenta ab heterogeneis liberare oportet, quæ hic adducere nequeo, ne longius in scribendo excurram. Nam si Cacochymia sibi relinqueretur, quæcunque talis sit, nulla spes sanationis esset, cum causa

in-

intacta relinqueretur , quod confirmat
CELEBERRIMUS BOERHAAVIUS
§. 503. dicens : *Cancer magnus &c. in
corpore simili cacochymico ad Cancrum
composito, aliis jam Cancris in eodem cor-
pore sociatus, nec ferro, nec medicamen-
tis tangendus est.* Et ideo, quamvis in
tractatu hoc nulla de extirpatione Can-
cri mentio fit, tamen corpus a succis
pravis liberandum est, ne causa Cancri
continuo latitet, quæ pluribus ansam
præbet. Annuit in hæc ILLUSTRISSIMUS
L. B. VAN SWIETEN in Comment.
§. 505. his verbis : *Omniū optimum
est, modo aliquam patiatur moram ferox
malum, apta medela tollere prius causam
Cancri, antequam extirpatio instituat.*
Et in Comment. §. 507. Nro. II. pag.
898. dicit : *Nihil magis nocet Cancro,
quam humorum acrimonia &c. sedulo er-
go inquirendum est, an hæc adsit, & qua-
lis? & deinde per idonea remedia singu-
lari acrimoniæ cognitæ opposita hæc emen-
da.*

dari debet. Ad quæ obtinenda levia purgantia & acrimoniam præsentem in corpore corrigentia danda erunt, ex quibus eminent Decocta ex Radicibus Bardanæ, chinæ nodosæ, scorzoneræ, Cichorei, Zarzæparillæ, Graminis, Polypodii, &c. Infusa Agrimonie, Fumariæ, Betonicæ, Florum Altheæ, Malvæ, Verbasci, Sambuci, Papaveris rhæados, summitates Pini, &c. diluetur etenim per hæc sanguis, & leviter attenuantibus & obtundentibus corrigentur humores. Et acrimonia noxia, & humores destruens, sicque a natura sua homogenea degenerare cogens mutabitur, & vel per urinam vel diaphoresin ex corpore expelletur: cui scopo etiam sales subalcalini optime adnumerantur, ut est sal polychrestus, cujus acre, & simul alcalinum per vaporem acidi vitriolici ex accenso sulphure immutatum est, qui resolvit, & leviter alvum movet, cui accenferi
non

non incongrue posset sal mirabilis Baadensis, de quo anno 1763, dum tractatum de thermis iisdem conscripseram, ejusque virtutibus mentionem feci, cum prior ex alcali nitri & acido vitriolico, hic vero ex terra Alcalina salis communis, & eodem acido vitriolico per totum tractum in scaturigine disperfo constet. Præter hæc, ut cura eo citius, eo facilius absolvatur, omni laude dignissimum per experimenta satis confirmata notum Cicutæ extractum in usum vocandum est. Cibus sit eupeptus, ut dicit CELEBRERIMUS BOERHAAVIUS Sect. 490. Nro. IV. *Victus est ex lacte recenti &c.* non vero Acria, Aromatica, Austera, spirituo-
sa, quæ motum velociorem causare possunt, eligenda sunt, sic & cibi difficilioris concoctionis locum non habent: si symptomata graviora dolorem augmentia urgeant, narcoticis succurrendum est, quorum in censu est semen Papaveris, vel in jusculo coctum, vel in emulsio-

D

nem

nem redactum, vel ipsum opium in
convenienti dosi ad grana propinatum,
quod nihil aliud est, quam succus Papa-
veris Asiatici. Cæterum, etsi ab ex-
terna causa, ut compressione, contu-
sione, &c. Scirrhus in Carcinoma mu-
tatus, ortus fuerit, qui facilius curatu
est, tamen in victu & medela pergen-
dum erit; cum attenuatio humorum
semper sit necessaria, non difficiles ve-
ro in continuatione diætæ miseri erunt,
cum malum hoc, & cruciatus experian-
tur, quo vero modo iis juvamen ferri
possit medicamento externe applicando
inferius dicetur. Est quidem hoc ex
acerrimis menstruis confectum, quæ
tamen arte in corpus medium transmu-
tata sunt; est etiam satis dilutum, ut
optatum effectum præstare queat, si-
cut monet Nenterus in cautelis suis pra-
cticis Nro V. dicens: *Omnia etiam cor-
rosiva, nisi maxime cicurata fuerint, per-
versum semper edunt effectum.* Satis ita-
que

que paucis his de scirrho, carcinomate occulto & aperto dixisse mihi videor, ulterius ad dirum & huic in cruciatibus perpetiendis fere non abfimile malum eodem medicamento curandum properare fas erit. Quare fit

C A P U T II.

De Spina Ventosa.

§. I.

Dum de ea necessaria dicere animo constitui, experientiis edocto eodem medicamine miseros hoc morbo afflictos variis, & in - & externis frustra tentatis per longius tempus doloribus vexatos feliciter restitutos fuisse, eo facilius, eo jucundius scribendi superesse argumentum autumo, quo certius experientias meas autoritate suffultas a CELEBERRIMO BOERHAAVIO optata mihi fortuna cernere con-

tigit: Dicit enim Ille immortalis monumento dignus Vir §. 512. *Ipsa ossa patiuntur similes iis, quos hactenus in mollioribus partibus descripsimus.* Est autem Spina Ventosa ossis maxime circa Apophyses corruptio ab acri in ipsa medulla nato originem ducens: Differt a Carie ossium, quod in hac exeso periosteo externo os corrumpatur, in Spina Ventosa vero cellulis internis a sanie hic nata consumptis, periosteo interno ossis eroso id ipsum afficiatur, de quo videatur ILLUSTR. L. B. VAN SWIETEN in Comment. 526. pag. 920. *Adeoque ossis corruptela in parte interiori ossis primo incipit &c.* Paulo post: *Ubi vero ossis corruptela in exteriori parte incipiens versus interiora pergit, licet tandem ipsam medullam etiam inficiat, caries ossis vocabitur.* Quod vero Spina Ventosa maxime in Apophysibus accidat, ratio est, cum in iis substantia ossea tenerri-
ma sit, & inter eas vesiculæ medullo-

sæ hæreant, quibus sanie corruptis lamellas osseas ab utraque parte positas citius attingi posse videtur: Dixi maxime in Apophysibus, cum & in mediis ossibus malum hoc contingat. Oritur autem à stagnatione olei in cellulis medullofis ossium, dum hujus motus à quacunque causa impeditur, stante ergo hac stagnatione, nec articulos hujus partis, ubi facta fuit, nec interstitia lamellarum ossearum lubricare poterit, cum ex minimis his vesiculis ad loca necessaria libere afferri nequeat. Quam facile itaque hoc à suæ oleosæ tenacitatis natura deflectat, & in saniem putridam degeneret, ex hoc satis patet, quod blandissima pingua sponte in summam acrimoniam mutantur, præcipue, si accessus aëri libero concedatur, quod quidem hic fieri nequit, cum molliora extra os posita integumentis involuta idem ab aëre defendant, hinc etiam tam subitanea non fiet corruptio cellu-

lofi olei. Interim tamen, cum ftagnans hoc oleum medullofum remoretur in veficulis, & calor internus ab adjacentibus partibus adfit, facile in acrimoniam talem faniofam, vel citius vel tardius convertitur; quod autem calor maximum ad corruptionem tribuat', videmus, fi Butyrum recens tempore frigido aëri libero exponatur, nulla fequetur corruptio, fi vero calido vel tepido tantum expositum fit, citiffime corrumpitur. Calor itaque vitalis & remora ftagnans in veficula oleum in fimilem convertunt, & deinde medulla valde prona eft ad corruptionem, ut confirmat ILLUSTR. L. B. VAN SWIETEN §. 526. pag. 917. *Calor autem vitalis ftagnans illud oleum cito putrefaciet in primis cum ex propria indole medulla admodum prona fit in putredinem.*

§. II.

Ex his fequitur atrociffima hic ori-
ri mala, fi contempletur tenerrima va-
fo-

forum & partium hoc oleum fecernentium, colligentium, & deducendum structura, si enim arteriæ per substantiam ossis in medullam perveniunt, tunicam suam callosam amittunt, hinc valde molles & pulposæ evadunt, ita quidem, ut sine omni difficultate in liquamen oleosum conteri possint, multo magis in saniem acerrimam degenerare: Quod fit, si hoc oleum in vesicula stagnat, corrumpitur, erodit illam & partes sibi vicinas, & sic has irritando inflammationesque causando ulterius serpit. Quemadmodum enim ichor in cancro vicinas partes corrodit, ex qua corrosione & pressione vascula vicina corripuntur, ita & hic eadem accidere possunt, quia tam parum in spina ventosa bona & laudabilis fit suppuratio, quam in cancro, cum saniei indoles, sicut in eo, acerrima sit, & ex osse educi nequeat; hinc, etsi pus hic loci colligeretur, deberet attenuari &

in talem faniem putridam converti. Si ergo hæc fanies semper magis acris fit, corrodit vesiculam, in qua stagnavit, dein membranam medullæ externam, destruet pariter periosteum internum, & osseam à periosteo spoliata substantiam erodere inchoabit, quod autem citius & sæpius in Apophysibus ossium contingere soleat, superius dixi: si dein ossea hæc substantia interna destructa sit, fanies hæc afficit etiam lamellas externas ossis, inter quas ulterius serpere potest, usque dum osoferum sit. Patebit facile, quantis miseri, si vascula viva & substantia periostei interna destruitur, doloribus vexentur, qui ex inflammatione oriuntur, hinc sentiunt dolores punctorios pertinaces, pulsationes, calores, qui inflammationis effectus sunt, ut superius in §. primo de carcinomate dictum est. Si vero periosteum externum corrupto & exeso osse afficitur, magis

au-

augentur dolores, & ad tactum exacerbantur adhuc molestius, qui prius non adfuerunt, dum periosteum externum a sanie adhuc illibatum fuisset. Nam, etsi fortior pressio externa facta fuerit, hostis latebat in osse, & ab externis mollioribus impositis, & ipsa dura ossis substantia tuebatur medulla, quo minus affici, & pressiones externas sentire potuerit: quamprimum vero periosteum affectum est, partes molliores supra hoc positæ tumescere incipiunt & ipsius ossis tumor observatur, quo facto signum est periosteo externo corrupto ulteriorem sibi saniem parare viam, quod fieri nequit, nisi os & periosteum externum destructum sit, cui acrimoniæ infensæ tanquam causæ cacochymia, scorbutus, in junioribus rachitis, & forte lues venerea vel contracta, vel hæreditaria ansam præbent: noscuntur & causæ externæ, nempe fortior contusio & ossium fracturæ, ex qui-

bus etiam medulla affici potest, uti auctoritate suffulcit ILLUSTRIS. L. B. VAN SWIETEN §. 526. pag. 919. dicens: *à validis tamen contusionibus & fracturis ossium lædi posse medullam nullus dubitat.* A quacunque igitur causa vel in - vel externa malum originem habeat, si partes molliores sanie hac fere inextinguibili erodantur, & prægressa inflammatione, in gangrænosam corruptionem mutantur, erosio omnino partibus & vasculis in mollioribus extra os positis à tumore distendetur, & rupturæ fiet proxima cutis, quæ accidet, dum ea à tumore omnino tenuior reddita sanie erosa aperietur, & ulcus nascetur, ex quo primo pus extillans observabitur, dein vero sanies sequetur. Quid igitur bonæ prognosis sperandum est, ubi sanies omnia corrumpens & depascens adest? præter dolores intolerabiles sufferendos nihil, nulla enim in cavo ossis hærentis corrupti

rupti olei absterfio possibilis, neque via fufficiens patet, qua exitus pararetur, hinc femper acrius hoc medullofum oleum vicinas afficiendo cellulas fieri ex remora & calore necesse est, quod destructis continuo vesiculis & per offis lamellas ulterius serpens idem lamellatim secedens reddit, quod asperitate sua & pondere teneram medullam ita afficiet, ut inflammetur, & eadem, de quibus dictum fuerat, denuo efficiat. Uti affirmat ILLUSTRISSIMUS L. B. VAN SWIETEN in Comment. §. 528. pag. 921. dicens: *Præterea, si offis interna superficies ab acri hac Sanie erosa fuerit, corrupti offis partes, quamvis a sanis & vivis partibus separarentur, hærent in medio offis cavo, & mole sua & asperitate teneram medullam læderent, sicque nova producerentur mala. Certe, quam dira ex hoc morbo producta mala sint, experientiæ medicæ fatis docent, etenim dolores intolerabiles, miræ*
offium

offium degenerationes , febres ex irritatione ab acri, mors denique ipsa sequelæ fuerunt funestissimæ.

§. III.

Ne igitur funesta hæc enumerata accidant, studendum est, ut præter secretum mox enumerandum medicamen externe applicandum indicationibus correspondentia interne etiam assumantur, ideoque invigilandum erit an Cacochymia, & qualis causa fuerit? an Lues venerea præcipue in infantibus hæreditaria malo ansam præbuerit, vel an illud ex fortiori forte contusione, ut sæpe in semiluxatione V. g. à casu, qui parentibus celatur, contingere solet, originem ducat: dixi præter secretum mox enumerandum &c. cum tantum de ea Spina Ventosa curanda hic agatur, in qua tumor incumbentium partium sponte apertus est, ut de Carcinomate dictum fuit: Nam si apertus nondum est, externe nihil applicandum esset, quod
fana-

fanaret , cum via nulla adhuc fit : si enim malum in cavo ossis adhuc latet , & hoc partim ex signis , partim ex Cachymia indagata patet , aliam medellam in usum vocandam esse , certum est , quæ ut obtineri possit. Consultatur ILLUSTR. L. B. VAN SWIETEN in Comment. §. 529. usque §. 531. à pag. 921. usque pag. 926. si vero ea ejus ut dixi indolis sit , indicatur , ut sanies detergatur , & à sua maligna corrupte acrimonia liberetur , ad quod obtinendum Decocta leviora pro potu ordinario ex Ligno Juniperino , Sassafras , Bucci , Quajaci &c. proficua erunt , inter quæ tamen eminet Lignum Quajacum , quod vero rasum sit , cum dura nimis ejus substantia aquam eludat , quare parva quantitas salis Alcalini cujusdam , ut V. g. Tartari addi solet , ut aqua penetrare possit , & ita fiet Decoctum levius , si refina ultimatim per additum spiritum vini non extrahatur , pro
potu

potu ordinario. Exstat talis formula, sed resinâ jam extractâ per spiritum, quod unum mihi videtur in materia medica, & Remediorum formulis CELEBERRIMI BOERHAAVII pag. 312. Sect. 529. Nro. I. dum de Decocto rasi Ligni Quajaci agit, dicens: *Super residuo Decocti novæ Aquæ lb viij. affusæ ebulliant per quatuor horas &c. Utatur pro potu quotidiano.* Dixi unum mihi videri, an Resina extracta sit, nec ne. Ratio hujus est, quod, etiamsi adhuc infit, aqua eandem resolvere nequeat, cum tantum spiritus menstruum ejusdem solvens sit; hoc suppeditabit in junioribus serum lactis, vel si Diathesis scorbutica, adsit decoctum ex Radice Scorzonæræ, Zarzæparillæ, Chinæ nodosæ, Foeniculi, Graminis, Liquiritiæ &c. parari potest, arridet tamen levius Decoctum ex Rasura Ligni Quajaci ad gratum saporem conciliandum Passularum minorum, si idonea quantitas adjecta fue-

fuerit , uti & in fine coctionis de his radicibus quidquam addi ad libitum potest ; sæpius præterea præcipue in initio purgans propinetur , V. g. ex Diagrydio, Radice Jalappæ pulverifata , in Junioribus cum quodam fyrupo , V. g. Florum Acaciæ , Florum Perficorum &c. in Electuarius redactum , in magis provectioribus Refina Jalappæ cum Diagrydio : Stibio Diaphoretico non abluto , vel etiam ubi suspicio quædam hæreditarii , aut contracti mali venerei est , Mercurius dulcis cum Diagrydio , ut exstat in CELEBERRIMI BOERHAAVII *Materia medica & remedium formularum* Sect. 507. Nro. II. vel etiam Extractum Catholicum in robustis addito ad grana aliquot Mercurii dulcis & Refina Jalappæ in Pillulas redactum , in usum vocari possunt , his vero medicamentis per longius tempus ab initio frequentius V. g. omni septimana , deinde vero remissius continuari debet , donec

nec malum cesserit, quod ex tumore concidente & remissione symptomatum innotescit, longiorem ergo malum hoc, usque dum extirpatur, curam exigit. Quod clarissime exponit ILLUSTRISSIMUS L. B. VAN SWIETEN in Comment. §. 530. pag. 925. dicens: *Sic vidi aliquoties successisse curam, postquam per plures menses similia adhibita fuissent.* Debet itaque ideo continua faniei acerrimæ fieri deterfio, & ad alias partes derivatio, quæ tamen eo minus nocebit, quo magis totum corpus diluentibus & detergentibus impletum est, nam etsi massæ sanguineæ communicata fuerit faniei pars, infringunt hæc ejus acrimoniam: Quod parvuli non tam copiose bibant, verum quidem est, sed cum in iis teneriores sint vasorum texture, & facilius tubuli ad excretionem prompti sint, per assumpta talia vel urinæ excretio, vel transpiratio augebitur: five ergo unum alterumve fiat,

fanies

fanies ab assumptis diluta simul cum secretis humoribus in locis suis aptis excerni e corpore poterit. Ex his mihi videtur satis illucescere, cur Medicamenta superius recensita diutius continuanda sint.

§. IV.

Si vero malum ita increverit, ut majorem partem medullæ infecerit, & vasa sana ad eam tendentia ab hac fanie erosa sint, quæ humores ad diluendam & detergendam acrimoniam ad locum affectum ferre deberent, pejus est, sed tamen, cum medicamenta interne sumpta hac virtute polleant, ut faniei virus per vivum forte adhuc vasculum ad sanguinem reductum cicuretur, continuari debent, ut in vivis adhuc adjacentibus partibus medulla diluatur, & deterfio fiat: sic præter usum medicamenti externi etiam internis prospicietur, ut facilius mali a bonis fieri separatio, & faniei ulterior progressus

E

im-

impediri, si ex apertura effluere cogatur, possit; quod certe fit, sicut & ossa corrupta per hanc exeunt. Verum, dum tota medullæ substantia simul, ac omnia vasa ad eam ducentia, & ab ea revertentia integri ossis ab acerrima sanie destructa est absque eo, quod ipsa ossis substantia esset adhuc corrupta, per applicationem medicamenti externi malum profligari nequit, cum via naturalis ad effluxum Materiæ saniosæ non pateat. In quo casu quid agendum necesse sit, consulatur ILLUSTR. L. B. VAN SWIETEN in Comment. §. 530. pag. 925. Hic enim loci de cura Spinæ Ventosæ tantum sermo est, in qua os corruptum, & integumenta aperta sunt: neque de ea agitur, ubi fere integra ossis substantia, vel Apophysis integra erosa est, ut aspectu horrendæ duæ depictæ tabulæ exstant apud *Cornelium Triven* in *observationibus medico-chirurgicis* Tab. VI. & VII. Quemad-

mo-

modum vero medicamenta continuan-
da esse superius dixi , ita & de victus
ratione mentio fiat, necesse est; hæc
itaque sint talia, quæ Eupepta dicimus.
De quibus in §. VIII. capitis primi di-
xi adducens auctoritatem CELEBER-
RIMI BOERHAAVII de *materie medica*
& *remediorum formulis* Sect. 490. Nro.
IV. *victus est ex lacte recenti, lacte ebu-*
tyrato & sero lactis, ex jure carniū
quarumcunque recentium de quadrupedi-
bus & volatilibus, ex frumentaceis, ave-
na, hordeo &c. ex oleribus, ex fructibus
mitibus, maturis, ut Portulaca, Pruna
Sylvestria, Pyra, Austera &c. Sect.
28. Nro. IV. ex hordeatis Panatelis &c.
Potus esto Decoctum ex Radice Chinæ, Zar-
zæparillæ &c. videatur & Sect. 35. Nro.
I. præterea convenient carnes anima-
lium juniorum, olera mollissima, ut la-
ctuca, Cichoreum, Portulaca, fugian-
tur econtra cibi austeri nimium, terre-
stres, ficci, uti & carnes, piscesque

fumo, fale, & aëre indurati, Fabæ, Pifa, ficut etiam Farinofa cruda non fermentata omittenda funt; cum facile viscera lentore inſuperabili infarciant, præcipue in tenellis, quibus omnibus rite perpenſis pro poſſe meo ſatisfeciſſe ſperans non diutius hic remorabor, ut curioſi Lectori medicamenti innotefcat.

METHODUS PARANDI.

R. Ramentor. Ferri lotor. & ſupra ignem in vaſe aperto ſiccatorum & minutiffime contuſorum, ſalis Armoniaci in pulverem redacti aa unc. iv. mixta dentur in Retortam terream optime in fundo & circumferentia lege artis munitam, imponatur hæc capellæ, admoveatur vas vitreum recipiens, quod bene lutetur: detur ignis in gradu digeſtionis, & dum retorta caleſcieri incipit, augeatur ſucceſſive ad ſublimationis, finitaque ſublimatione ad calcinationem.

nationis gradum. Hoc facto successivæ refrigerationi committatur retorta, & ex refrigerata, fractaque accipiatur calcinatum in fundo hærens, caput mortuum teratur, & subigatur minutissime in mortario lapideo, dein subactum imponatur in vas vitreum & affundantur spiritus vini rectificatissimi Empyreumaticum odorem non redolentis ℥ ij. agitentur sæpius primis octo horis: post viginti quatuor horas agitatis denuo instilletur tribus quatuorve interstitiis observatis acerrimi, ut vulgo vocatur, olei vitrioli nigri unc. j. ad quamvis instillationem semper tamen mixta agitando; dein in quiete permittantur per viginti quatuor horas, his elapsis decantetur Tinctura, residuo vero in fundo affundantur prioris spiritus vini ℥ ij. agitentur iterum pluries, dein extractio de novo relinquatur per viginti quatuor horas, his transactis instilletur iterum, ut prius, olei vitrioli supra dicti unc. j.

effervescentia finita vero infundantur spiritus tartari simplicis unc. iv. agitentur, & finita agitatione aliquoties repetita relinquantur in vase per viginti quatuor horas; his elapsis secunda hæc solutio misceatur priori decantatæ, & optime simul agitentur, tunc parata est ad usum PANACEA NOSTRA ANTI-CANCROSA.

OBSERVATIONES CHEMICÆ.

Postquam Ramentorum Ferri lotorum & ficcatorum, salisque Armoniaci aa unc. iv. retortæ undique argilla optime munitæ commisi, lege artis admovi recipientem, quem optime lutavi. Dedi in principio ignem digestionis, dumque retorta calefieri ad sensum mihi videretur, ignem successive auxi, hoc factò, dum Phlegma se infinuaret, quod ignis incremento in recipientem stillavit, ascendi usque ad gradum sublimationis, postmodum recipienti se flo-

flores, ut alias dici assueverunt, puto
salis Armoniaci Martiales primo in pau-
cissima quantitate subtilissima flavedine
tincti insinuabant, dein vero magis ma-
gisque albi apparuerunt; verum, cum
nullam amplius florum sublimationem
observaverim, reverberio reliqui re-
tortam, sicque sensim igne extincto re-
frigerio totum commisi, dimoto vero re-
cipiente odore flagrantissimo nares fe-
riebantur; antequam autem hoc fa-
ctum fuisset, ponderavi vitrum, cui ex
recipiente amoto Phlegma illud omni
possibili celeritate communicavi, & idem
conclusi; æquabat hoc pondere unc. j.
dr. j. ex recipiente tamen ingens ad-
huc volatile undique dispergebatur per
longius temporis spatium fere intolera-
bile. Bene itaque vitro munito ad
cætera inquirenda properavi: collegi
in recipiente superius sublimatos flo-
res firmiter adnexos: diffracta retorta
reliqua patefecit in fundo, sed prius

flores rostro quasi affixos removi, prioribusque addidi, qui simul ponderabant dr. ij. β gr. viij. in retortæ parietibus sursum versus & in fundo undique apparebat sal, quem collegi pondere æquantem dr. iij. & gr. vij. in fundo ulterius conspicuum fuit calcinatum, sub & in quo hinc inde apparuit crocus Martis, quæ simul ponderata aliquantulum excesserunt unc. v. deficit ergo partim cum in retorta, rostro ejus, & recipiente quid remanserit, partim per volatile perditum fuerit, in pondere unc. j. dr. j. gr. XLV. Hæc sunt quæ adducenda habeo, quæ ulteriori analyfi chemicæ ordine subjiciam, & quidem primo.

Phlegma hoc ab aqua adhuc ex lotione forte, si quæ superfuisset, relicta, cui immixtus est sal Alcalinus volatilis, seu urinosus, dependet, sed melius esse puto, si liquidum hoc spiritum salis Armoniaci Alcalino urinosum volatilem dixerò, cum ingentis
fla.

flagrantiae fit , ut sentit *Neumanus* qui eundem processum chemicum cum Marte & Sale Armoniaco instituit, ut dicit *Part. IV. regni Animal. Cap. XXIV. pag. 1351.* Accepi de hoc spiritu parvam quantitatem, instillavi oleum tartari per deliquium absque omni tamen nota effervescentiae, sed dum oleum vitrioli in aliud vas, in quo idem erat, instillavi, horrende effervescebat, tentavi pariter per syrupum violarum aqua dilutum, sed parcissima copia eum attigit, cum jam in summum colorem viridem mutatus esset, abunde itaque patet quod alcalinus sit. Secundum quod obtinui, flores sunt, qui pro floribus salis Armoniaci Martialibus habentur non obstante, quod nihil nisi sal Armoniacus noviter sublimatus sint, ut asserit *Neumanus in eodem Cap. & pag. explicans*, quod nihil aliud sint idiomate germanico, quam de novo sublimatum sal ammoniacum, in quibus tamen quæ-

dam particulæ Martiales latitant, ex quibus color dependet. Sal vero Armoniacus est neuter, hinc nec cum Acido nec Alcalino effervesce debet, quod tamen factum est, dum hos flores, ut saltem ego obtinui, syrupo violarum diluto immisi, viridem colorem manifestaverunt, cum oleo tartari per deliquium nec signum effervescentiæ, cum oleo vero Vitrioli insignem patefecerunt.

Idem contigit cum sale in parietibus retortæ firmiter adhæso, & vi ope scindentis instrumenti separato, hinc quoque Alcalinum ut flores esse existimo, qui saporem empyreumatico - adstringentem retulit, præter odorem autem empyreumaticum & volatilem nullum, hinc videbatur mihi volatile satis in illo latitare, quod tamen quoad maximam partem liquido communicatum est, cum facile per ignem moveri queat. Non tantum in hoc, verum in aliis processu-

cessibus Chemicis idem observare licet, sic si ficcissima animalium ossa per torturam ignis coguntur, & si recipiens optime lutatus fuerit, volatile tamen flagrantem odorem sparget undique, qui ad sufficientem distantiam nares affligit, quod & in nostro subiecto pariter contigit: ideo, cum hoc non minus alcalinum, quam prius sit, etiam quoad partem ex alcalino volatili urinoso sal Armoniacus oriatur. Verum quidem est eundem componi ex sale marino & fuligine, verum noster fuligo ex vegetabilibus oritur, qui ad producendum salem Armoniacum difficulter quid tribuet, locus vero, ubi frequentissimus & optimus sit, Ægyptus est; cur autem ibi commodissime fiat, ratio est, quod Incolæ lignorum loco fimum collectum in globos redactum animalium, in quo etiam sal urinosus est, comburant: ex quibus patet, etiamsi parcissima quantitas vegetabilis straminis com-

commixta fit, fuliginem secure pro alcali haberi posse, & quidem pro alcalino urinoso, quod sale suo volatili gaudet. Non ergo amplius quæri potest, cur in hoc processu Chemico nares a volatili foetido afficiantur, nam sal urinoso-volatilis & alcali falis Marini a suo acido relinquuntur, quia cum Marte se conjungit, omnia enim Acida terras alcalinas relinquunt, & se cum Mineralibus maritant. Supereſt ut calcinatum in fundo hærens attingam.

Est vero hoc, Mars in naturam fere mediam conversus, cum acidum falis Marini, quod in sale Armoniacali intime mixtum fuit, se illi sociaverit, quod ex croco Martis colligi potuit, deinde reliqua producta omnia fuerunt alcalina, quia acidum hoc se ab illis liberavit, & cum Marte conjunxit, de quo, ut certior sim ad tentandum, an nulla de se signa præbeat, instillavi super calcinatum oleum tartari per deliquium

quium sine omni minima etiam effervescentiæ nota, in alio vero vase instillavi aliquid olei vitrioli acerrimi, quod non tantum potenter effervesceret, verum fumando ebulliret, quod mihi eam ob causam factum fuisse videtur, quia qua potentissimum acidum primogenium omnia reliqua acida superare potens acidum salis marini à sua cohæfione cum Marte liberaverit, & expulerit, seque cum eo hoc dissipato conjunxerit. Verum quidem est, oleum vitrioli cum solo Marte effervesce, uti in alio vitro tentavi, sed impetus tamen diversus observabatur. Quod autem acidum salis Marini in Marte hæferit, partim ex supra dictis, partim ex his patet, quod Martis pondus, quod antea unciam quatuor fuit, ultra unciam increverit; nisi conjecturari liceret, quod hæc quantitas acidi salis Marini ei mixtum fuerit, si vero simul acidum cum alcalino volatili & terra
salis

salis Marini alcalina fuisset sublimatum, nec sal, nec Spiritus alcalinæ profapiæ esse potuissent, quod idem de floribus intelligendum est, quæ ulterius doctis in Arte Chemica viris inquirenda relinquo, speroque eos, si forte in illis aberrasse videar, errorem benevolentia suâ recompensaturos.

Hoc itaque ultimum calcinatum, de quo nunc egi, cum reliqua ad medicamentum non spectantia lubens præteream, in vas vitreum imposui tritum, & subtilissime imminutum, fudi supra hoc spiritus vini rectificatissimi ℥ ij., agitati per octo horarum spatium sæpissime, dein in quietem reposui, color in toto ex cinereo ater, sed in margine superius aliquantulum fuscus apparuit: elapsis viginti quatuor horis acerrimi olei vitrioli repetitis vicibus successive, semper tamen agitando vas vitreum, unciam unam instillavi, ex quo effervescentia summa multum fumi spirans orta

ta est : cujus ratio videtur, ut superius de expulsiōe acidi salis Marini dictum est; dein sæpius iterum agitavi, & vitrum optime munivi; & postquam quieti commisi totum, præcipitatio Martis facta est, crocus tamen ab acido extractus & liquido communicatus apparuit, cum illud supernatans colori corticum aurantiorum non absimile fuerit, sed ita, ac si oleosæ tenacitatis esset, imo Crocus paululum in superficie sedimenti conspicuus erat: post viginti ergo quatuor horas decantavi liquidum, & decantatum vitro tradidi, cui operculo firmo prospexi, iterumque residuo affudi spiritus vini supra dicti ℥ ij. agitabam, ut prius; verum, dum compositum minimæ quieti relinqueretur, non ejusdem coloris, ut in prima operatione factum est, remansit, sed spiritus vini statim post agitationem à croco tinctus est, & iterum Corticibus Aurantiorum æmulantem colorem sedimento

po-

posito retulit, post frequentiore[m] vero agitationem de novo quieti per viginti quatuor horas commisi, & his finitis instillavi olei vitrioli acerrimi, ut superius in formula exstat, successive unciam unam, agitavi, ubi facta semper iterum fuit nova impetuosa effervescentia, ut prius vitro ingenter calefacto, donec cessaverit, & postea spiritus tartari simplicis addidi unc. iv. ex cujus additione præter fumum & levem effervescentiam nihil observavi, cessante vero ea & auditui minime sensibili ultimatim contentum in vitro optime conquassavi, & quieti per viginti quatuor horas denique commisi, his præterlapsis liquidum decantatum priori miscui, & agitatum simul in lagena vitrea usui servavi. Feci in formula hujus Medicamenti mentionem de oleo Vitrioli acerrimo, quod vulgo oleum nigrum Vitrioli vocari consuevit, cujus parandi Methodus sequens est.

R. Vi-

R. Vitrioli Anglici optime calcinat. ℥vj. detur in retortam ferream, ponatur ea in reverberium, eligatur recipiens sat amplus, qui longissime à Reverberio distet, quod impetrari poterit per Rostra sibi continuo applicata, bene tamen lutata, quo & recipienti prospiciendum est, ut nebulæ sulphuræ condensari possint, & recipiens non rumpatur, detur dein ignis ad extremum caloris gradum per quatuor dies & noctes, & tunc invenietur oleum Vitrioli in Recipiente grave & Cristallinæ naturæ, quod nigrum erit. Ita habet *Hellet in Academia scientiarum.*

Non quidem scrutinio Chemico meo vilissimo subjicere audeo, verum hoc, quod ad minimum motum in vitro clausum, vel etiam aperto eo fumum spiret, causam inquirendi ansam præbuit, verum, dum rem serius contemplerer, quidquam inflammabilis sulphurei in eo latitare judicavi, dicit enim

F

Ipse,

Ipse, ut nebulæ sulphuræ condensari possint. Quod confirmat Neumanus P. I. Cap. viij. de acido vitriolico & destillatione Vitrioli pag. 179. Nro. V. quæ igitur judicasse gaudeo, ad quod me tantus fumus ejus instillatione facta memorem allicuit, ut hujus rationem scrutarer, rem altiori mente perlustranti visum est, ac si oleum hoc acidum salis Marini expellendo Marti sese conjungendo inflammabile sulphureum dimitteret, cum id cum acido salis quasi avolet, & in auras dispertiatur, his pro posse meo perpensis, necesse esse autumo, ut accelerem etiam adducere, qualis sit.

MEDENDI METHODUS CUM CAUTELIS.

I. In Cancro aperto labia tumida fungosa apparentia ope pensilli undique inungenda sunt, attendendum tamen, ne in profundum ulceris quid communice-
retur, quia ingentem causaret dolorem, si vasa & Nervi adhuc viva sint
mor-

mortuo undique adjacentia , aut per eum in superficie dispersa, hac præcautione bene habita , & inunctione in loco præscripto facta remoretur paululum, donec imbutam esse tincturam videatur, dein imponi poterit linteolum simplex, aut solum , aut huic quadruplicatum, vel pluries adhuc compositum pro ratione partis, ne pressio tamen fiat, interim cautela prius dicta observetur, ne ulceri quid instilletur , hæc functio per diem tribus vicibus reiterari poterit, & si vel Cancri partes linteolo se applicent, vel in spina ventosa magna saniei quantitas exstillet, vel partes ossæ corruptæ & erosæ , aut in parvis lamellis exfoliatæ se in superficie insinuent, aut linteolo adhæreant , ulcera linteo tantum mundificanda sunt.

II. Si V. g. in Spina Ventosa in parte sit cutis aperta , in sibi vicina vero, vel supposita parte tumor nascatur, aut effluxus saniei cesset , vel imminuatur,

idem promovendus & induratus tumor emolliendus est, quod obtinebitur, si Emplastrum paulo post enumerandum applicetur, vel si nullus tumor adsit, sed saniei effluxus solum imminutus, præter hoc, quod limbus ulceris inungitur, tamen idem Emplastrum est ulceri applicandum, quia inunctionem omittere non suadendum est.

III. Conspicua erit in utroque malo post inunctiones crusta, quæ continuo inungatur, necesse est, nec vi ea rapiatur, cum ea cum tempore, etsi in majorem molem se elevaverit, sponte decidat, & quandoque putridum secum trahat, hinc vi auferenda non est, sed cum inunctione continuandum, & non tantum crusta, sed & in circumferentia, ubicunque rubedo apparet, inunctio locum habet.

IV. Si crusta, quod plerumque in Spina ventosa fit, decidat, sanguis potissimum ex ulcere stillat, verum nihil ma-

li portendit, mundificata pars de novo inungatur, dein accidet, quod nova crusta oriatur, quæ, si decidet, sanguis pure mixtus exstillabit, & hoc formatis sæpius crustis accidet tam diu, usque dum mala a bonis separata sint. Inungendo igitur longiori tempore, & in usum simul superius recensita medicamenta vocando spes certa sanationis affulget.

V. Notandum tamen, quod si Cancer nimium inveteratus sit, & suas radices in profundum disperferit, dum ruptæ ejus pelles sunt, nec de inunctione quid auxilii sperandum esse, dixi ideo in §. Cap. I. quod carcinoma occultum, quod & de scirrho intelligere volo, in apertum citius mutandum esse videatur, ne malum profundiores agere radices queat, præterea medicamentum hoc discutit, & resolvit, hinc & in scirrhis usum habet.

VI. Denique tam in Cancro quam in Spina Ventosa pars inuncta libera maneat absque applicatione linteaminum, donec inunctio ficca videatur; si vero magnus in Cancro observetur foetor, plane nullum applicetur linteolum, sed potius liber permittatur, ut exhalationibus putridis via pateat; ne tamen vestimenta affectam partem cancrosam irritare valeant, fiat quædam machina cava, correspondens magnitudini tumoris, ne compressio fiat, quod fertum vocamus. Sit v. g. sequens methodus: Accipiat os Balænæ & incurvatum firmiter ligetur, involvatur deinde linteis ad proportionatam crassitiem, ut mamma cancrosa in eo recondita nec in ambitu premi, nec in superficie per vestimenta irritari possit, possunt ex aliis levioribus talia, & longe commodiora fieri ferta, quæ cujusque arbitrio relinquo. Et si forte præter mammam cancrosam glandulæ subaxillares scirrhosæ

apparerent, illico etiam inunctio instituenda est, ne malum ulterius serpat, nam accidit, quod si scirrhusæ concretiones minores inungantur, levior quædam crusta nascatur, ubi observatur, ac si in parte illinita transpiratio major appareret, & fit quandoque, ut crusta decedente, etiam tumor cum duritie evanescat, hinc non inaniter me fuisse mihi videor observatos in quacunque parte tumores scirrhusos, uti & Cancros occultos illiniendos esse, hæc methodus valet etiam in Spina Ventosa, ut quotidie circumferentiæ aperturæ tribus ac minimum duabus vicibus sedulo ope penilli inungantur; et si forte malum in maxillis, vel in manibus, vel in pedibus hæreat, pars illinita, quantum fieri potest, absque linteolo superimposito libera permittatur, & sic tota absolvitur cura. Sequenti vero formula communico etiam

EMPLASTRUM.

℞. ol. Rad. Consolid. m. Herb. & Flor. Hypericon. Flor. Verbasc. aa unc. iij. coquantur hæc olea prius separatim, si non existent, ponatur in vas debitum præscripto pondere, quibus addatur Cer. flav. finis. unc. iij. sevi. cervin. unc. j. β ceruss. venet. successive inditæ unc. ix. coque, instillando sæpius Acet. Lytharg. & continuo agitando ne nigrescat l. a. ad Emplastri consistentiam. Refrigeranti dein addatur Camphor. oleo solutæ unc. β bene agitur, fervetur usui. Cui ungt. de Lytharg. substitui potest, hæc ut dixi de Spina Ventosa intelligenda sunt, in Cancro vero occulto & scirrhis inunctio tincturæ tantum locum habet; medicamentis itaque fideliter communicatis adducere volui quædam.

OBSERVATA.

Fæmina quadraginta aliquot annorum per longissimum tempus Cancro
in

in mamma dextra aperto funestissime affligebatur; variis in usum vocatis tandem ad nostrum confugit medicamentum, dumque labia fungosa Cancri sæpius illinirentur, crusta apparebat, quæ tempore decidit, cum qua simul putrida Cancri pars ablata fuit, continuata fuit illinitio, facta denuo crusta post duos menses decidit cum alia Cancri parte, & postquam ulcus linteolo mundificatum erat, rubri coloris esse patuit, foetor remisit, tumorque concidit: continuabatur illinitio, sed misera, ubi spes sanationis affulgeret, viribus ob tam longos perpeffos cruciatus exhausta, tabida periit.

Matrona viginti aliquot annorum temperamenti sanguineo-phlegmatici in maxilla inferiori partis sinistræ scirrhum nucis avellinæ magnitudinis haud abfimilem multis annis gestavit, qui in principio minimus se tactui patefecit, usque dum in hanc molem increfceret;

Illa malo hoc afflicta se tinctura communicata inunxit ter de die, successive increvit crusta, quæ major & crassior facta madida semper apparuit, tandem post longius tempus sponte decidit, & sola rubedine relicta tumor disparuit.

Puella duodecim annorum Spina Ventosa in osse calcaneo, tibiaque quatuor digitis a tarso pedis sinistri, ut & in cubito brachii dextri horrendè vexabatur, quæ in omnium aperturarum circumferentiis fuit inuncta, neque linteolum insuper applicatum, multo minus tibialia concessa sunt, cum tempore calido hoc medicamento usa sit, interne sumebat Decoctum ex Radice Zarzæparillæ & strobil. pin. omnibus duabus aut tribus septimanis pulv. Rad. jalap. ad sc. ij. cum melle sumpsit, ubique formata est crusta, maxima vero in calcaneo, tandem post longiorem horum usum, decidit illa in calcaneo & simul of-

officula corrupta exfoliata sunt, pariter in tibia, & cubito aliæ deciderunt, sine conspicuis tamen officulis, & sic successive a malo liberata est. Possem plures adducere casus, sed brevitatis gratia, ne longius excurram, supersedeo. Unicum tantum, cum recentissimus sit, adducam.

Juvenculus ex sat nobili stirpe natus octo annorum, per tres fere annos Spina Ventosa in cubito brachii sinistri excruciabatur, apparuerunt duæ aperturæ superius, & inferius tumor durus, & sat magnus conspicuus erat; præter interna supradicta remedia circumferentiæ tinctura illinitæ sunt, verum, cum tumor emollitus non fuerit, Emplastrum superius communicatum applicatum est; quarta die aperiebatur, ex quo stillabat paullum puris, cum subsequenti sanie, cujus ulceris circumferentiæ pariter dein tinctura inunctæ sunt, remoto omnimode Emplastro: nasceban-

bantur ubique crustæ, & dum ea in cubito hærens desquammavit, pus cum sanguine mixtum effluxit, quod sæpius contigit, si crusta noviter formata decideret, & sic ante aliquot hebdomades a malo integre sanatus est.

His itaque pro viribus elaboratis & fideliter communicatis superest, ut votis meis medicamentorum effectus in solatium miserorum correspondeat, si hoc fiat, quod ex corde voveo, obtentus est studii & laboris mei

F I N I S.



ERRATA.

<i>Pagina.</i>	<i>Linea.</i>	<i>Lege.</i>
42.	1 ^{ma} . etamfi.	etiamfi.
56.	13 ^{tia} . oferosum.	Os erosum.
64.	3 ^{tia} . innotes cit.	innotescit.
66.	22 ^{da} . Triven.	Tricen.
68.	22 ^{da} . ionis.	tionis.
85.	16 ^{ta} . §	§ VII
86.	12 ^{ma} . quod.	quam.



